

Date – 21/12/2024

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. **Larsap Dr. Hari Babu Kambhampati'an Mizorama khua 118 chu kum tluana zawh theih kawngpui thain a la pawh lo a ti.**
2. **Chief Minister Pu Lalduhoma chuan entrepreneurship lamah sang tak thlen tumin Bana Kaih Scheme an tlangzarh thu leh dilna pawh sing chuang a luh tawh thu a sawi.**
3. **Kumina Krismas leh Kumthar vuakveta Aizawl bazara mipui pungkhawmah pawikhawihna leh thil bo report kum dang aiin a tlem hle.**
4. **Jaipur-a nimin tuka tuialhthei phur tanker puak vanga thi, mi 14 an tling tawh.**

<><><>

GOVERNOR AT NEC PLENARY MEETING

Larsap Dr. Hari Babu Kambhampati chuan Mizorama khua 118 te chu kum tluana zawh theih kawngpui thain a la pawh loh, furpui hunlaia tlawh harsa tak a la nih thu a sawi.

Vawiina North Eastern Council (NEC) Plenary Meeting vawi 72-na, Pragna Bhavan, Agartala, Tripura-a Union Home Minister leh NEC Chairman ni bawk Pu Amit Shah kaihruaia buatsaihah Larsap chuan he thu hi a sawi a. Mizorama khaw 118 chu kum tluana zawh theih kawngpui thain a la pawh loh avanga furpui hunlaia tlawh pawh harsa tak a nih thu leh, PMGSY hnuaiia siam tur pawhin ami chengte an tlem avanga danin a remtih loh thu a sawi a ni.

National Mission on Edible Oils-Oil Palm chu Mizoramah kum 2021 atanga kalpui a nih thu sawiin Larsap chuan oil palm tiak duhkawp a awm loh avang leh a phurh chhuahna kawngpui that tawh loh avangtea hmalakna zauh a har rih thu a sawi a. Hmarchhak state te chu organic farming-a hma la tha an nih thu sawiin, Department of Commerce leh APEDA-te nen thlai thar hralhna lam ngaihtuah tlan a tul a, hemi tur hian North East tan bik organic certification agency din a tul a ni, a ti.

Larsap chuan DoNER Ministry-in growth centre 24 leh border centre 20 tinzawna North East Economic Corridor din tura ruahmanna a neih mekah Ministry chu ramri kaltlanga insumdawntawna ngaipawimawh turin a ngen a. DoNER leh NEC hnenah Skill Development Centre tha ber ber din a tul thu thlenin state Sawrkar hnuaiia Industrial Training Institute-te pawh tihchangtlun a tul thu te, khawpui lian zualah handloom leh handicraft bakah organic thlai pho chhuahna tur 'common exhibition centre' mamawh a nih thu

a sawi a. Hmarchhak State-te tihhmasawn nana Sawrkar laipui hmalaknate fakawm a tih thu a sawi bawk a ni.

<><><>

RS MP

Rajya Sabha MP Pu K. Vanlalvena'n Sawrkar laipuaia Ministry of Home Affairs hnenah Manipur chungchang zawhna chhanna a dawn loh thu a sawi.

Akashvani Aizawl News in a kawmna ah he thu hi sawiin Pu K. Vanlalvena chuan Parliament thutkhawm neih zawh takah Manipur chungchang Ministry of Home Affairs ah a zawt a ti a, chhanna a hmulo tih sawiin pawl a tih thu a sawi.

Pu K. Vanlalvena chuan Session neih chhunga a zawhna zingah a khirh deuh avangin chhanna dawngloa a ngaih thu a sawi a, Manipur chungchanghian Manipur buaina avanga Central Force sipai thi tawh zat leh tun dinhmuna Central Force Manipur-a awm mek tih te ani a ti a, Sawrkar laipuiin Manipur buaina avanga nunna chan chhungte compensation a pe em tih leh ralthuam man zat tih a zawh chu chhanna a dawnglo tih a sawi bawk.

<><><>

CM AT NEC PLENARY SESSION

Chief Minister Pu Lalduhoma chuan mahni kutkawiha eizawna bul tanna, entrepreneurship lamah sang tak thlen tumin Bana Kaih Scheme an tlangzarh thu leh dilna pawh sing chuang a luh tawh thu a sawi.

Vawiina Agartala, Tripura-a NEC Plenary Session vawi 72-naah he thu hi sawiin Chief Minister chuan Viksit Bharat 2047 tihhlawhtlin nan leh DoNER Ministry hmalakna tihlawhtling zual turin Mizoram sawrkar chuan khawvel huapa hmasawna ruhrel tha nena thuam Industrial Zone din an duh tih a sawi a. Kum reiloteah sustainable development goals leh thalaite tana hna siam belh lamah an than chhoh ngei a rin thu a sawi a. Prime Minister Pu Narendra Modi-an hmarchhak bialte chu India ram ei leh bar dinhmun tisang thei tur, economic powerhouse ni thei khawp hiala theihna nei an ni tia a lo sawi tawh angin hmarchhak bialah hmasawna chak taka kalpui turin remna leh muanna boruak tha tak siam a ngai a ti a, theihtawp chhuah turin state tin aiawha kalkhawm te a sawm a ni.

Chief Minister chuan DoNER Ministry kal tlanga project thehluh kalkawng thui leh rei lutuk chu awlsam zawka kalpui dan dap ni se a duh thu a sawi a. Zaa 10 GBS chu awmze nei leh tam zawk an hman theih nan DoNER in Finance Ministry nena hma lain state sum indaih lohna laia project lian leh rotling thawh nana hman turin ruahman se a duh thu a sawi a. Ram mipui tam ber te inngahna Agriculture lama hmasawna a thlen theih nan Ministry of Jal Shakti hnuiaia Command Area Development Programme funding pattern chu 50:50 ni lovin 90:10 ni thei se a duh thu bakah thil pawimawh dang te a thlen a ni.

<><><>

ACCIDENT

Vawiin chhun dar 11 : 20 khan Pu Lalremruata (Tetea) Mamit P & E department a lineman hna thawk mek chu an hnathawhna hmun Bairabi road Power Sub Station (Power Sub Station No 2) ah chesualin a boral.

Mamit P & E department hotute hnen atanga thudawn danin Pu Lalremruata hi a thiante 5 nen Bairabi road power sub station ah hian hnathawkin an kal a, power sub station a transformer te zawk, electric current kallo tura ngaihah hna an thawh laiin electric current in man thutin a boral nghal a ni.

Mamit P & E department hotute chuan Current-in pu Lalremruata a man dan hi an la hriatchian theih loh thu leh, electric current kal thut dan an la hriat loh thu an sawi a. Zirchian phawt a la ngaih thu an sawi a ni.

Pu Lalremruata ruang hi vawiin chawhnu khan Mamit District Hospital ah postmortem a nih hnuah a pu H. Thantluanga Vengthar, Behliang vengah lak niin zaninah tlaivar pui a ni ang a, naktuk chhunah vui tur a ni ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

CHRISTMAS PREPARATIONS

Krismas leh kumthar lo thleng mai tura inpuahchah mek, Aizawl bazar hmuna mipui pungkhawmah kum dang aiin pawikhawihna leh thil bo report a tlem.

New Market Beat Police Duty-ten Akashvani palai an hrilh danin kum dang zawng aiin kumin hian pawikhawihna leh thil bo report an dawng tlem tih an sawi a. Tun kar chung pawhin thil bo report an dawn loh thu an sawi a ni.

Krismas leh Kumthar lo thleng tur lawm turin mipuite an inpuahchah mek a, Aizawl Bazarpu pawh a ni telin a lun chho mek a. Ni tlem te chiah Krismas atana inpuahchahna hun a awm tawh karah bazara sumdawngte chuan kumin bikah naupang school an chawlh har deuh avang te, online bazar leh shopping mall dangte a awm thluah tawh avangin kum dang angin bazar a lun lutuk lo nia an hriat thu Akashvani an hrilh a. An thil zawrhte pawh kum dang aia an la hralh tam rih loh thu sawiin, sum lengvak mipuiah a tlem hrim hrim nia an hriat thu an sawi a ni.

Krismas leh kumthar mahni khaw lama hmang tura haw pawh an thahnem tawh hle a, Aizawlah chuan zingkarah pawh lirthei chhuak a tam tawh bakah hmun thenkhatah phei chuan traffic-te a jam a ni. Krismas lo thleng tur hmuakin mipuite kawng hrang hrangin an inbuatsaih tih Akashvani palai C. Lalthansangi chuan a sawi.

<><><>

WEATHER FORECAST

IMD Aizawl chuan vawiin leh naktukah ruah tlem a sur dawn a ti a, chhum a tam avangin mipuite lirthei khalh fimkhur turin an ngen.

IMD Aizawl Director Sudheer Kumar Dwivedi sawi danin Aizawl ah ruah tlem a zawng sur chhonzawm zel thei a ni a ti a, boruak in vawh lam a pan zel dawn tih sawiin zan lamah a vawt zual thei tih a sawi a. Director chuan chhum a tam avangin lirthei a chhuak leh ke a kal te fimkhur turin a chah a, lirthei pawh chak taka khalh lo turin mipuite a chah bawk.

<><><>

JAIPUR GAS TANKER EXPLOSION DEATH TOLL RISES

Nimin tuka Jaipur-a tuialhthei phur tanker puak vanga thi chu 14 an tling tawh a, SMS damdawi inah hliam 27 enkawl mek an ni bawk a, SMS hospital Supdt. Dr Sushil Bhati-a sawi danin hliam zinga 6 chu ventilator hman tir an ni.

Chetsualna hi Jaipur leh Ajmer inkar, Bhankrota-a thleng a ni a, tuialhthei phur tanker hi puakin nasa takin a alh zui a ni. Jaipur Police Commissioner, Biju George Joseph-a sawi danin, tanker puak vang hian lirthei 40 a kang chhia a, kawngpui leh lama pipe siamna factory pawh a kang chhe vek a ni. He thil thlen chhan chhui tur hian state sorkar chuan Jt. Investigation Commt a din a, chhui hna an zawhfel hunah report an thehlut ang.

<><><>